

جَزَائِرَ مَحَاكِرَ

جمعه ایرتسی

نومرو	شعبان	سنه	كانون ثانى	سنه	صحيفه
۹۱۰	۲۰	۱۳۱۴	۱۱	۱۳۱۲	۱۲۸۷۷

(اشبو غزته بهر هفته جمعه ایرتسی کونلری چیقار . سنه لکی درسعات ایچون مجیدیه یکریمی غروش)
 (حسابیه التمش غروشدر . طشره لر ایچون اون بش غروش پوسته اجرقی ضم اولنور . بهر)
 (نسخه سی ینه مجیدیه یکریمی غروش اولق اوزره یوزباره یه هر یرده صاتیلور . درج اولنه جق)
 (اعلاناتک هر برندن بر مجیدیه اخذ اولنور . سنه لکته مشتری اولق استیانلر عدلیه نظارتی)
 (دأره سنده کائن جریده محاکم اداره سنه مراجعت ایلیلدر)

قسم غیر رسمی

طر بزون استیناف محکمه سندن ۶ شباط
 سنه ۳۰۹ تاریخی و یکریمی التی عددی ایله
 ویریلان اعلامک مابعدی

بوراسنه تعرض اولنماسی و کندیسنک بیان
 ایتدیکی اراضی ایله خصملرینک اراضیلرینک
 حدودلرنده مابینت اولوب اولمدینی اکلشلق

ایچون کشف اجزاسی لازم کلور ایکن بوراسنه
 دخی دقت اولنماسی مخالف قانون اولدیغندن
 بحتله اعلامک تقضی استدعاسندن ومدعی علیهما
 مراد و امین اغالرک لایحه لرنده مندرج نتیجه
 جوابلری دخی حق قرار اون سنه بلانزاع طاپو
 ایله تصرف اولنان اراضی حقنده اولوب یوقسه
 طاپوسز اراضی یه شامل اولمدینی کی اراضی
 مذ کوره نک اراضی امیره دن اوله رق با طاپو
 عهده لرینه تفویض قلندینی قریه لری هیئت
 اختیاریه سنک شهادتنامه سی ومجلس اداره نک

قراريله ثابت اولديغندن ومنزبور حسن افنديك
قریه مذ کورده اراضی واریسه ده بشقه
حدودله محدود اولوب محل منازع فيه اصلاً
تعلق اولديني دفتر خاقانی مأمورینک درکناريله
تحقیق ایتدیکندن کشفه دخی حاجت قالدینی
بیانیله موافق قانون اولان اعلامک تصدیق
طلپندن عبارتدر.

ایجابی لای المذاکره اعلام مذکور
مندرجاتندن اکلشالینی اوزره اراضی
مذ کورده منزبور حسن افنديک وقوعبولان
مداخله سنک منعنه قرار ویرلمش ایسه ده دعوی
عینده خصم الحقی ذی الید اولسنه کوره منازع
فيه اراضیه واضع الید کیم اولدینی اصولاً اثبات
وتحقیق ایتدیرلکد نصکره منزبور حسن افندی
اراضی منازع فیهای اون سنه دنیرو بلا نزاع
تصرف وزراعت ایتدیکده اولدینی ادما ایتدیکی
جهتله ایشو تصرفی اراضی مذ کورده نک مهاجرینه
تفویضندن اول ویا صکره میدر بوجهتک دخی
تدقیق قلمسی لازم کلور ایکن بوراسنه رعایت
اولنامسی وارضی مذ کورده نک تعیین وتحقیق
حدودی ایچون کشفی اجرا قلمق مقتضی ایکن
بلا کشف حکم اولنسی یولسز واصل و قانونه

مغایر و مستدعی تمیزک اعتراضاتی موافق نفس
الامر اولدیغندن اصول محاکمه حقوقیه قانونک
ایکیوز اوتوز ایکنجی ماده سی موجبجه اعلام
مذ کورک تقضیه قانون مذ کورک ایکیوز قرق
دردنجی ماده سی حکمنه توفیقاً کیفیتک یکیدن
بالرؤیه اعلامه ربطی ضمنتده محکمه مذ کورده
اعاده سنه وزیرده مفرداتی مرقم بشیوز یکرمی
اوج غروش مصارف محاکمه نک ایلروده حقسز
حقیقه جق طرفه رجوع ایتک اوزره اول امرده
مستدعی تمیزدن التمسنه ۲۴ نیشان سنه ۳۱۱
تاریخنده متفقاً قرار ویريله رک تفهیم قلندی.

پوغون بدایت محکمه سندن ۱۹ قانون ثانی
سنه ۳۱۰ تاریخی و قرق بر عددی ایله ویریلان
اعلامک تمیزینی استدعا ایدن بوغون قضاسنک
ووشتنه قصبه سنده ساکن پاپا اندون وکیلی
مصطفی افندی ایله مدعی علیه درسعادتده بکقوزده
قره جه برون جاده سنده شرکت خیریه مجلس
اعضاسندن تحسین بکک یاننده مقیم خلیل یشار
وکیلی احمد مختار افندی یوم معینده دائره یه کلریله

ایضاحات شفاهی لری استماع قلندقد نصکره
تدقیقات تمیزیه اجرا سنه ایتدار اولندی.

اعلام مذ کورک خلاصه مالی منزبور
خلیل یشار اغانک مذ کور ووشتنه قصبه سنده
واقع متصرف اولدینی معلوم الحدود بردونم
مقداری برقطعه بانچه سنه مرقوم پاپا اندون
فضولاً مداخله ایدرک اوزرینه کلبه انشا وخرمن
احداث ایلمش اولدیغندن بحثله مداخله واقعه نک
منعی و مذ کور کلبه نک هدمی طلب ودعوی
ایتمی و مدعی علیه مرقوم پاپا اندون محل منازع
فیهی سکزسنه مقدم خاقو عثماندن تفرغ واشترا
ایتدیکنی مدافعه انبا و برقطعه طابو سندی ابراز
واعطا ایلنسی اوزرینه محل مذ کورک کشفی
اجرا قلنمش ایسه ده مدعی علیه مرقوم پاپا اندون
یوم معینده اجابت ایتامش اولدیغندن محافظه
حقوقی ضمنتده بر وکیل مسخر تعیین قلندقدن
صکره جریان ایدن محاکمات و تدقیقات نتیجه سنده
محل منازع فیه مدعی منزبور یشار اغانک اونیرو
سنه دنیرو بلا نزاع ید تصرفنده اولدینی استماع
قلنان شهودک شهادت واقعه سیله تبیین وتحقیق
ایلمش و مدعی علیه مبرز طابو سنندنده محرر
عرصه منازع فیه عرصه اولیوب دیگر عرصه

ایدوکی و عرصه مذ کورده نک قیمت حقیقه
وحاضره سی ایسه قرق عدد لیرای عثمانی اولدینی
واوزرینه انشا ایدیلان کلبه وخرمانک قیمتلی
بیک یوز اوتوز درت غروشندن عبارت بولدینی
اولبابده کی کشف راپوری مندرجاتندن اکلا
شلمغله محله نک طقوز یوز التنجی ماده سنک صوک
قره سی حکمنه توفیقاً مدعی علیه مذ کور
عرصه و واقع اولان مداخله سنک منعنه و مدعینک
دخی سالف الذکر بیک یوز اوتوز درت غروشک
مدعی علیه ایدن اعطاسیله مذ کور کلبه وخرمانی
اشترا ایتسنه حکمدن و مستدعی تمیز پاپا اندون
وکیلی مصطفی افنديک ایشو حکم علیه نه
لایحه سنده محرر اعتراضنک خلاصه سی دعوی
واقعه عقاره متعلق اولقی حسبیه اول امرده
توجه خصوصت ضمنتده ذی الیدک مسئله سنک بالینه
اثبات ایتدیرلنامسی و منازع فیه عرصه موکلنک
طابو سندی موجبجه ید تصرفنده اولدینی
و مذ کور طابوده محرر حدود ایله محدود
بولدیغنک اثباتنه مهیا بولدینی حالده محکمه جه
بوراسنک نظر اعتباره التماسی و ذکر اولنان
اینیه عرصه نک قرق زراع محله انشا اولنوب
بونک کافه عرصه اوزرینه قیمتک حساب ایدلسی
یولسز و مغایر قانون اولدیغندن بحثله اعلامک

نقضی ومدعی علیه یشار وکیلی احمد مختار
افندینک بوکا قارشو نتیجه اجوبه سی ایسه اعتراضات
مسروده نك واهی و بی اساس اولدینی بیانیه
ردی وموافق اصول وقانون اولان اعلامك
تصدیق طلبندن عبارت بولمشد .
ایجابی مذاکره اولدقدده اعلام مذکور
مطالعہ سندن منقہم اولدینی اوزره مزبورہ یشارک
منازع فیہ عرصہ اون برسہ دنبرو بلانزاع عہدہ
تصرفده اولدینی استماع قلنان شہودك شہادت
واقعه سی واجرا قلنان کشف ایله ثابت اولوب
مدعی علیه مرقوم پایا اندونك ابراز ایلدیکی
طایو سنہ سنده محرر عرصہ منازع فیہ عرصہ
اولیوب دیگر بر عرصہ ایدوکی جہتلہ مداخلہ
واقعه نك منعمہ وعرصہ مذکورہ اوزرینہ مدعی
علیه طرفندن انشا ایدیلان کلبہ وخرمانہ تقدیر
ایدیلان بیک یوز اوتوز دوت غروشك مدعیدن
اخذیلہ مدعی علیه مرقوم اندونہ اعطاسنہ حکمدن
عبارت اولسنہ نظراً حکم مذکور اسباب موجبہ
مسئند اولہرق اصول وقانونہ موافق بولندیفنہ
ومستدعی وکیلی مصطفی افندینک تمیزاً سرد
ایلدیکی بالادہ محرر اعتراضاتیلہ اعتراضات
سائرہ سی بالتدقیق نقض حکمی موجب کوریلہ .

لازقہ بدایت محکمہ سندن ۸ شباط
سنہ ۲۰۰۵ تاریخی واورا وچ عددی ایله ویریلان
اعلامك تمیزی استماع ایدن لازقہ سنجاغنه
تابع سخرخو قریہ سی اہالیسندن عبداللہ صبیح
یوم معیندہ دائرہ کلبوب میز علیہ لازقہ مدہ مقیم
مخائیل قیصلہ وکیلی الیاس رسام افندینک ورود
ایتمش اولسنیلہ ایضاحات شفاهیہ سی استماع
قلنہرق تدقیقات تمیزیہ اجرا سنہ ابتدار
اولندی .

اعلام مذکور خلاصہ مالی صالح صبیح
ذمتدہ الاجبی بولنان یدی بیک اوچوز غروشه
برادری مرقوم عبداہ صبیح کفیل اولہرق

کفالتی حاوی برقطہ سند دخی ویرمش اولدینی
حالدہ قضاء سند مذکور ضایع ایدوب کفیل
مرقوم ایسہ مبلغ مذکور تادیہ دن امتناع
ایتمکده اولدیفندن بختلہ اقامہ ایلیہ جکی شہودك
استماعیلہ ادعا ثابت اولدقدنصکرہ مبلغ مزبورك
تحت حکمہ التمسینی مزبور مخائیل فیصلہ طلب
ودعوی ایتمسنہ قارشو مدعی علیه عبداہ صبیح
دخی کفالتی وبویلہ برسند وپردیکی انکار ایله
برابر مدعی مرقومك بوندن ایکی ای اولجہ هر
بر حق ودعوادن کندوسنی ابرا ایدرک یدینہ
برقطہ ابرانامہ دخی ویرمش اولدیفندن شمدی
دعواہ صلاحتی اولہ میہ جفتی ومذکور ابرا
هرتقدر ضایع اولمش ایسہدہ شہود ایله کیفیت
ابرانی اثبات ایلیہ جکتی مدافعتہ درمیان ایتمسیلہ
مدعینک دعواسی مندفع اولمش اولسنہ مبنی سندن
ضیاعی تدقیق وتحقیقہ لزوم قانونی کوریلہ مدیکی
جہتلہ مدعی علیہک اشبو دفع دعواسی حقتدہ
استماع شہودہ قرار ویرلدکن ومدعی مرقوم
مدعاہ اولان یدی بیک کسور غروش حقتدہ
کندوسیلہ صالح اولق اوزره مدعی علیہک معلوم
الاسامی کسان وکیل وحکم تعیین ایتمش اولدیفنہ
دائر مدعی علیہک امضاسنی حاوی برقطہ سند
ابراز ایدرک مرقوم عبداللہک اشبو سندی

موجبہ جہت کفالتدن یدی بیک غروش دینی
صالحہ وقوعبولان طلبیلہ اقرار ایتمش اولدیفنی
ادعا ایتمش ایسہدہ سند مذکورك مؤداسی مال
دعواسندن صالح صورتی متضمن اولسنہ بناء
مدعی طرفندن دخی اوپولده اعطا قلنان سندلہ
برابر بحسب التناقص حکمدن اسقاطنہ قرار
ویرلدکن صکرہ ابرا حقتدہ استماع اولنان
شہودك شہادتتری دعواہ موافق کوریلہ مدیکندن
اثبات مدعا ایلمسی لزومی مدعی علیه مرقومہ
تکلیف اولندقدہ اثباتدن اظهار عجز ایتمش
ومؤخرأ کفالت دعواسنک تدقیق ضمندانہ تعیین
اولنان کوندہ دعوتہ دخی اجابت ایتمش اولسی
اوزرینہ وکیل مسخر حضوریلہ جریان ایدن
محا کمرہ وتدقیقات نتیجہ سنہدہ مدعی مرقومك
ادعاسی وجہلہ مدعی علیه عبداہ صبیح برادری
صالح صبیحك بااعلام محکومہ دینی اولان یدی
بیک کسور غروشه کفیل اولدینی استماع اولنان
شہودك شہادتتریہ تبیین ایلمش اولدیفندن مجلہ نك
التي یوز اوتوز بشنچی ویک سککز یوز اون
سکزنچی مادہ لری موجبہ مدعاہ اولان مبالغدن
یدی بیک یوز اوتوزالتي غروشك مدعی علیہدن
تخصیصیلنہ ومدعی مرقومك زیادہ دعواسیلہ
معارضدن منعمہ حکمدن واشبو حکم علیہندہ

مستدعی تمیز عبداه صیدیک لایحه سنده محرر
باشلوجه اعتراضی ابرا دعواسنک اثباتی ضمننده
اقامه ایلدیکی شهود اصول مشروعه سنده موافق
صورته ادای شهادت ایشلر ایکن شهادت لرینک
رد ایدلسی وخصمی طرفدن اقامه اولنان شهود
مجله نك بیک یدییوز بشنچی ماده سی موجبجه
مقبول الشهاده اولدقلری حالد محکمه مذکورجه
اورایه دقت اولقمسزین مقبول الشهاده طوتلمسی
یولسزومغایر قانون اولدیغندن مجله اعلام مذکورک
نقضی استدعاسندن ویمیز علیه وکیل الیاس رسام
افندیکنک نتیجه جوابی دخی حکم واعلامک
موافق قانون اولدینی بیانیله تصدیقی طلبندن
عبارت بولمشدر.

ایجابی لدی المذاکره تمیزی طلب اولنان
اعلام مندرجاتندن مستبان اولدینی اوزره جهت
کفالتدن دعوی اولنان مبالغ بشیک غروشی
متجاوز اولسنه کوره اصول محاکمه حقوقیه
قانون موقتک سکسانجی ماده سی موجبجه
سند ایل اثبات ایدلسی لازم کلورکن درجه اولی
محکمه سنجه شهود شخصیه استماع قلمسی غیر
جائز اولدینی کی قانون مذکورک سکسان ایکنجی
ماده سنده محرر فقره استثناییه دخی سندک تحقق

ضیاعی حالنده شهود شخصیه استماعک جوازینی
متضمن بولمنسه نظراً مدعینک مجرد سندی ضایع
ایتدم دیسلیه مبلغ مدطابه حقنده شهود اقامه سنده
صلاحیتی اولمیه جقندن مدعی مرقومک ضیاعی
بیان ایلدیکی سندی نه صورته ضایع ایلدیکنک
تحقیقه کیفیت ضایع ثابت اولدینی تقدیرده بینة
شخصیه مراجعت ایدلک لازم ایکن بویولده
اجرای معامله اولنامسی ومدعی علیه جانبندن
مدافعه درمیان اولنان ابرای عدم دعواسنی
اثبات ایدمیدیکی صورته خصمی تحلیف حق
باقی اولدینی حالد طالب تحلیف اولوب اولدینی
مدعی علیه عبداه صیدیکدن سؤال اولقمسزین
سالف الذکر ابرا دعواسنک دخی عدم نبوته
قرار ویرلسی یولسز و اصول وقانونه مغایر بولمش
اولدینه بناءً قانون من بورك ایکوز قرق برنجی
ماده سی موجبجه اعلام مذکورک تقضیه ایکوز
قرق دردنچی ماده سی حکمنه توفیقاً کیفیتک
صور مشروحه دائره سنده یکیدن بالرؤیه اعلامه
ربطی ضمننده محکمه مرقومه اعاده سنده وزیرده
مفرداتی مرقم درتیوز طبقوز بحق غروش
مصارف تمیزیه نك ایلروده حقسز چیه حق طرفه
رجوع ایتک اوزره اول امرده مستدعی مرقومدن

النسبه ۲۸ حزیران سنه ۳۰۹ تاریخده متفقاً قرار
ویرله رک تفهیم قلندی.

ادرنه استیناف محکمه سنده ۲۸ شباط
سنه ۳۱۰ تاریخ و قرق بدی عددی ایل ویریلان
اعلامک تمیزی استدعا ایدن اسکجه قصبه سنک
جامع عتیق محله سنده ساکنه خانجی وبقال
اصنافندن قسطه بیقه وکیل احمد مختار افندی
یوم معینده دائره کیش ایسده مدعی علیهما
قصبه مذکورده مقيم اصحاب علاقه دن احمد بک
زاده حسین نیازی و سلیمان سری بک کلدکلرندن
مستدعی مرقوم وکیلک ایضاحات شفاهی سی
استماع قلندقدنصرکه تدقیقات تمیزی به اجرا سنده
ابتدار اولندی.

اعلام مذکورک خلاصه مالی مومی الیها
حسین نیازی و سلیمان سری بکارک اسکجه
قصبه سنک بازار یری جوارنده کائن متصرف
اولدقلری معلوم الحدود چقور خاندن مستأجرأ
اقامت ایدن مرقوم قسطه بیقه بلا مأذونیت
مذکور خانک حوالی سنده فضولاً و غصباً ابنه

انشا ایلمکده اولدیغندن ابنه مذکورک هدمیه
خانک مع مشتملات طرفلرینه تسلیمنی اسکجه
قضای بدایت محکمه سنده مراجعتله طلب ودعوی
ایلملرینه قارشو عندالمحا که مدعی علیه
مرقوم قسطه دخی منازع فیه خان اجدادندن
بدرینه و بدرینک دخی وقوعوقاتی جهتله کندوسنه
انتقال ایتدیکنی ومدعیله اجاره زمین نامیه سنوی
اوچوز غروش اعطا ایتدکه اولدینی مدافعه
انبا وصورت تصرفی مبین برقطعه سند ایله اجاره
زمین حقنده کی علم و خبری ابراز واعطا ایلمسی
اوزرینه جریان ایدن محاکمات و تدقیقات نتیجه سنده
منازع فیه خان ابنه سنک جد و پدرندن انتقالاً
وقدماً مدعی علیه مرقوم قسطه بیقه نك عهد سنده
ویرلرک مبنی اولدینی زمینک دخی اجاره معینه ایل
مدعیلرک تحت تصرفنده ایدوکی مبرز علم و خبرلر
ایل طرفینک اقرار واعتراف وتصدیق لرندن
وعادات قدیمه نك بووجهله ایدوکی دخی مبعوث
طابو اداره سی تذکره سی مندرجاتندن کلاشلمغله
مدعی مومی الیهمانک اولبابده کی استدعایلرینک
ردینه واولجه تعطیل عملیات حقنده ویرلمش
اولان امرک رفنه دائر محکمه مذکورده دن
ویریلان اعلامک عندالاستیناف اصول محاکمه
حقوقیه قانوننک یوز طقسان التنجی ماده سی

حکمه توفیقاً اسباب قانونیه به مبنی فسخیه کیفیت
 اصول و قانون دأثره سنده رؤیت و حکم اولنسی
 ضمنتده درجه اولی محکمه سنده اعاده سنده حکمدن
 و مستدعی تمیز قسطه بیغه و کیلی احمد مختار
 افندینک اشبو حکم علیه سنده کی اعتراضاتنک
 خلاصه سی درجه اولی محکمه سندن ویریلان
 حکم قطعی اولوب بونک استینافاً فسخنده استیناف
 محکمه سنک یکیدن رؤیت دعوی ایتک ایجاب
 ایدرایکن خلاف اصول اوله رق بدایت محکمه سنده
 اعاده سنده قرار ویرلمسی مغایر قانون اولدیفندن
 بختله تقضی و مدعی علیهما سلیمان سری و حسین
 نیازی بکدرک لایحه لرنده مندرج نتیجه اجوبه لری
 ایسه اعتراضات مسروده نک واهی و بی اساس
 اولدینی بیانیه ردی و موافق اصول و قانون
 اولان اعلامک تصدیقی استدعاسندن عبارت
 بولمشدرد.

ایجابی مذاکره اولندقدده اعلام مذکور
 مندرجاندن منظم اولدینی اوزره مومی الیها
 سلیمان سری و حسین نیازی بکدرک تصرف
 ادعاسنده بولندقلری مذکورخان مرقوم قسطه به
 یدردن انتقال ایدوب تحت تصرفنده ایدوکی
 ویا لکن زمینک اجاره معینه ایله مومی الیهمانک

حقسز حقیقه جق طرفه رجوع ایتک اوزره اول
 امرده مستدعی مرقومدن المنسبه ۱۵ تشرین ثانی
 سنه ۳۱۱ تاریخنده متفقاً قرار ویریله رک تهمیم
 قلندی .

قوصوه ولایتی استیناف محکمه سندن
 ۱۳ تموز سنه ۳۰۹ تاریخی واون ایکی عددی ایله
 صادر اولان اعلامک تمیزیستی استدعا ایدن تلغراف
 وپوسته نظارت علیه سی وکیلی قره کین افندی
 یوم معینه دأثره به کله رق مدعی علیه قالقاندن
 قصبه سنک جدید محله سنده مقیم محمد رضا اغا
 گمیدی کی جواب لایحه سی کوندر مدیکندن
 باش مدعی عمومی معاونلردن سعادتلو یورغا کی
 افندینک مطالعه نامه سی استماع قلندقدن صکره
 اصول محاکمه حقوقیه قانوننک ایکوز بکرمی
 طقوزنجی موجبجه تدقیقات تمیزی به اجراسنه
 ابتدار اولندی .

اعلام مذکورک خلاصه مالی قالقاندن
 تلغراف وپوسته مأموری ایکن وفات ایدن انور
 افندینک اتسای مأمور یتیده ذمتنه کچورمش

اولدینی بش بیک یدیبوز کسور غروشک متوفای
 مرقومک کفیلی مزبور رضا اغادن تحصیل تلغراف
 وپوسته باش مدیری جانبندن طلب و دعوی و مجلس
 اداره ولایتدن مصدق برقطعه محاسبه دفتری ابراز
 واعطا اولمنسبه قارشو مدعی علیه وکیلی طرفندن
 اولنان طلب اوزرینه کیفیتک ایکنجی دفعه اوله رق
 میزله بالحواله انلر طرفندن تنظیم واعطا قلنان
 راپور اوزرینه جریان ایدن محاکمه و تدقیقات
 نتیجه سنده متوفای مرقومک امانات وارده
 وسائر دن درت بیک اوچیوز سکسان غروش
 ذمتنه کچوردیکی مذکور راپور مألندن اکلشدیقته
 مبنی مبلغ مدطابک کفیل مزبور رضا اغادن مع
 فائض تحصیلنه دأثر بدایه ویریلان قرارک
 عندالاستیناف تصدیقنه حکمدن و مستدعی تمیز
 نظارت مشار الیها وکیلی قره کین افندینک اشبو
 حکم علیه سنده لایحه سنده مندرج اعتراضاتنک
 خلاصه سی مومی الیه انور افندینک وفاتنده بالجله
 دفتری تحت تمهیره النوب مجلس اداره ولایتدن
 محاسبه سی بالتدقیق بش بیک یدیبوز الی درت
 غروش اونپاره ذمتی تحققی ایتدیکنه دأثر ابراز
 ایدی لان مصدق محاسبه راپوریتک حاوی اولدینی
 مواده قتاعات کامله حاصل اولمش ایکن کیفیتک
 یکیدن میزله حواله سیله انلر طرفندن ایکنجی

دفعه اوله رق ویریلان راپورک اساس اتخاذه
نقصان حکم ایدلمسی و برای محاکمه محلی محکمه سنه
کیدن حکومت محلیه وکیلک یوزده بش حسابله
عائداتله استیخدام اولندی حقوق مشاورلکی
تعلیماتی وخرج راه قرارنامه سنک ماده مخصوصه لری
منطوقجه متحقق ایکن وکیل مومی الیه یومیه
وخرج راه تعیین و حکم اولنماسی مغایر قانون
اولدیغندن بخله اعلامک نقضی استدعاسندن و معاون
مومی الیهک مطالعه سی دخی دعوی واقع
تلغراف مأمورینک امور مأموره سنندن دولای
تحقق ایدن ذمتک تحصیلنه متدائر اوله رق ذمت
مذکورک ظاهره اخراجی ایسه مجالس اداره جه
تدقیق ورؤیت محاسبیه منوط اولدیغنه و مجالس
اداره دن ذمت مضبطه سی ویرلمدکجه محاکم نظامیه جه
فصل دعوی وظیفه داخلنده اوله میه جنی بیانندن
عبارت بولمشد .

ایجابی مذاکره اولندقدده اعلام مذکورک
نتیجه مفادی متوفای مومی الیه انور افندیکنک
امانات وارده و سائرده دن ذمت کچورمش اولدینی
عندالمحاسبه اصولاً تحقق ایدن درت بیک اوچبوز
اون سکز غروشک کفالتی حسابله مزبور محمد
رضا اغادن تحصیلنه دائر بدایه ویریلان حکمک

چال بدایت محکمه سنندن ۱۸ مایس
سنه ۳۱۰ تاریخی والی عددی ایله صادر اولان
اعلامک تمیزیفی استیضا ایدن چال قضاسنک
تیورجی قریه سننده مقیم اوچنجی بلوک ردیف
یوزباشیسی مصطفی لطفی افندی ایله مدعی علیه
قریه مذکورده ساکن مهاجر لطفی یوم معینه

دائره به کلدکرندن اصول محاکمه حقوقیه
قانون موقتک ایکوز یکرمی طقوزنجی ماده سی
موجبجه تدقیقات تمیزیه اجراسنه ابتدار
اولندی .

اعلام مذکورک خلاصه مالی مزبور
لطفینک مومی الیه مصطفی افندی ذمتده خدمتکار
لقی اجر تندن طولایی الاجنی اولدینی بالا قامه
استماع اولنان ایکی نفر شاهدک شهادتیه ثابت
اولان یکرمی درت مجیدینک تحصیلنه دائر محکمه
مذکورده دن استیضال ایتدیکی اعلام غیابی
علیهنده مومی الیه مصطفی افندی طرفندن
اعتراض علی الحکم عرضحالی اعطا قلمش ایساده
یوم معینه عدم اجابتیه مبنی عرضحال مذکورک
ردینه حکمدن و مستدعینک اشبو حکم علیهنده
لایحه سننده محرر خلاصه اعتراضاتی مدعی لطفی
طرفندن ویریلان استیضاتک بیکیاشیلغه تقدیم
ایدیلوب اورادن محکمه به حواله اولنسی و مبلغ
مدعابه دینی اولدیغنه دائر اعتراض استدعاسنده
درمیان ایتیش اولدینی ادعاسنه بینه طلب
ایدلماسی وائشای محاکمه ابتدائیه ده مدعی طرفندن
اقامه ایدیلان شاهدلردن بریسی شریکی اولسیله
شهادتده حیر مغنم اولدینی درکار ایکن محکمه جه
قبول ایدلمسی مغایر قانون اولدیغندن بخله اعلامک

ایجابی مذاکره اولندقدده اعلام مذکورک
نتیجه مفادی دعوی واقع حقنده لاحق اولان
اعلام غیابی علیهنده مومی الیه مصطفی افندی
طرفندن اعتراض علی الحکم استدعاسی اعطا
قلندی حالده یوم معینه اجابت ایدلماسنه مبنی
عرضحال مذکورک ردینه حکمدن عبارت
اولسنه نظراً حکم مذکور اسباب موجبیه مستند
واصول و قانونه موافق اولدیغنه و مستدعینک
درمیان ایلدیکی بالاده محرر اعتراضات ایله سائر
اعتراضاتی نقض حکمی موجب اسباب قانونیه دن
کوریه مدیکنه بناءً اعتراضات مباحوث عنهانک
ردیه اعلام مذکورک تصدیقه وزیرده مفرداتی
مرقم یوز او توز سکز یجق غروش مصارف
تمیزیه نک مستدعی به رجوع ایتک اوزره اول
امرده مدعی علیه لطفیدن النسنه ۲۱ تشرین ثانی
سنه ۳۱۱ تایخنده متفقاً قرار ویرلدی .

تکفور طاغی بدایت محکمه سندن ۱۷ شباط
سنه ۳۱۰ تاریخی و یوز عددی ایله ویریلان اعلامک
تمیزینی استندایدن: تکفور طاغی قصبه سنک
جامع عتیق محله سنده ساکن قریبی حاجی صالح
وحاجی شفیق اغالر و همشیره سی صابره خانم و کیلی
کوچک مصطفی افندی ایله مدعی علیه محله
مذکورده مقيم قریبی بقال حاجی سلیم اغا یوم
معینه دائر یه کلدکلرندن اصول محاکمه حقوقیه
قانوننک ایکوز یکریمی طقوزنجی ماده سی
موجبجه تدقیقات تمیزیه اجراسنه استدار
اولندی .

اعلام مذکورک خلاصه مالی مرقومون
حاجی صالح و شفیق اغالر ایله صابره خانمک باشند
خاقانی مزبور حاجی سلیم اغا ایله مشترکاً متصرف
اولدقلری معلوم الحدود صرف ملک برباب مغازه
ایله برباب بقال دکانی و چقور چشمه جوارنده
مع خان بقال دکاننک اوچ حصه اعتباریه
بر حصه سنه مزبور حاجی سلیم اغا ایله مشاعاً
متصرف اولوب دیگر ایکی حصه لرینه دخی
مرقومون حاجی صالح و شفیق اغالر ایله صابره
خانم متصرف اولملریله عقارات مذکورده دن اسکی
جامع قارشوسنده کی مع خان بقال دکانی بش سنه

مدت و سننوی یکریمی اوچ ایرا اجر تله مزبور
حاجی سلیم اغا شرکای مرقومه دن استیجار ایتیش
ایسه ده ایلک سنه بدل ایجارندن یدی بچی ایرا
دینی قالمش اولدیغندن بختله مبالغ مذکورک تحصیلیه
عقارات مزبوره نک حصه اوزرینه افزازی
وقابل اوله مدینی صورتده مهائیه اجراسنی مدعیلر
و کیلی مصطفی افندی نک طلب و دعوی و برقطعه
مقاوله نامه ابراز و اعطا ایتسنه قارشو عندالحا که
مدعی علیه مزبور حاجی سلیم اغا دخی مبرز
مقاوله نامه بی بعدالتصدیق انجق بدل ایجارندن
شفیق اغالیله صابره خانمه عائد اولان قسمنک
تماماً کنندو لرینه اعطا و صالح اغایه عائد قسمنک
دخی امریه میخال که یایه و کریمه سنک البسه سنه
یوز یتیش بش غروش تأدیاتی اولدیغندن بونک
محسوبیه اوست طرفنک اعطاسنه مهیا اولدیغنی
مدافعه انبا ایتسی اوزرینه جریان ایدن محاکمه
و تدقیقات نتیجه سنده مبرز مقاوله نامه نک فسخی
موجب بر قید اولمادیغنی و حاجی شفیق اغا ایله
صابره خانم عائد بدل ایجارک کاملاً تأدیه و اعطا
قلندیغنی و صالح اغایه عائد بدل ایجارندن امریه
یوز یتیش غروشی تأدیه اولدیغندن محسوبی
عندالحا که سلیم اغا بیان ایتیش و یالکنز صالح اغا
طرفندن وقوع بولان انکار اوزرینه سلیم اغا

اثباتدن اظهار عجز ایله صالح اغانک تحلیفه طالب
اولمش و مزبور صالح اغا میخال که یایه یوز
وقزینک البسه سی بدله و یردیکی یتیش بش غروش
ایچون امری سبق ایتدیکی حقنده کی یمینی قبول
واجرا ایلمش و مذکور یوز یتیش غروش دخی
داخل اولدیغنی حالده مدعیلرک یدی ایرا ایتیش
سکنز غروش مدعی علیه حاجی سلیم اغا ذمتنده
الاجقلری اولدیغنی تحققات ایتیش اولدیغندن تحصیلیه
و عقارات منازع فیها نک تفریق و تقسیمی حقنده کی
ادعایلرینک هنوز ایجار مدتک عدم انقضاسندن
ناشی ردینه حکمدن و مستدعی تمیزلر و کیلی
مصطفی افندی نک اشبو حکم علیهنده لایحه سنده
محروم اعتراضاتک خلاصه سی منازع فیه دکانی
مستاجر سلیم اغا تحریک ایدرک دیگر بردکان دها
علاوه سیله . آخره ایجار ایتکده اولسی و بوا یسه
فسخ مقاوله بی موجب بولمنی جهتله محکمه جه
بودعایلرینک نظر اعتباره التمسین حکم محکمه
مسکوت عنه بر اقلیمی و ویریلان حکمک بر ماده
قانونیه استناد ایدلما سی مغایر قانون بولمنش
اولدیغندن بختله اعلامک نقضی استدعاسندن
و مدعی علیه حاجی سلیم اغانک لایحه سنده مندرج
نتیجه اجوبه سی اعتراضات مسروده نک واهی
وبی اساس اولدیغنی بیانیله ردی و موافق اصول
و قانون اولان اعلامک تصدیق طلبندن عبارت
بولمشدر .

ایجابی مذاکره اولدقده اعلام مذکور
مطالعہ سندن منفهم اولدیغنی اوزره مستاجر
مزبور حاجی سلیم اغا تحت استیجارنده بولنان
منازع فیه دکان و سائر دخی تخریب ایدرک و طوز
انبار لرینی دخی بوزهرق دکان حاله افرایه
آخره ایجار ایتکده اولدیغندن بختله اولبابده کی
قونطوراتو احکامنک فسخی عندالحا که مدعیلر
درمیان ایلمشلر ایسه ده محکمه جه بودعایلر
اعتباره التمسین حکم محکمه مسکوت عنه
بر اقلمش و بوا یسه نواقص تدقیقاندن معدود
اولهرق بولمنش و مغایر قانون اولدیغنی و مستدعیلر
و کیلی مصطفی افندی نک اعتراضی دخی بوجهته
متدائر اولهرق شایان قبول بولندیغنه بناء اصول
محاکمه حقوقیه قانوننک ایکوز اونوز ایکنجی
ماده سی موجبجه اعلام مذکورک نقضیه قانون
مذکورک ایکوز قرق دردیجی ماده سی حکمنه
توفیقاً کیفیتک صور محرره وجهله بالرویه
اعلامه ربطی ضمننده محکمه مذکوریه اعاده سنه
وزیرده مفرداتی مرقم اوچ یوز سکسان بش بچی
غروش مصارف تمیزیه نک ایلروده حقسنز

چقیقه حق طرفه رجوع ایتک اوزره اول امرده
مستدعیلردن النسخه ۱۷ کانون ثانی سنه ۳۱۱
تاریخنده متفقاً قرار ویرلدی .

اعلان

متوفاة حفیظه خانم ورثه سنک متوفی حسین
جودت افندی ورثه سی ذمتنده قسمت عسکری
محکمه سندن ویریلان فی ۳ رجب سنه ۳۱۴ تاریخلی
برقطعه مقتضا اعلامی موجبجه الاجقاری اولان
مبالغ معلومه نك تأمین تأمین استیفاسی ضمتنده
مرهون وفروختی محکوم بولنان یکی جامع شریف
حولیسند و واقع بوز اوتوز اوچ نومروایله مرقم
برباب قهوه دکانی دروننده موجود بربر کدکنک
اشبو تاریخ اعلاندن اعتباراً اون بش کونصکره
فروخته تشبث اولنه جفتدن طالب اولنلرک پی
سورمک و بوندن دهها زیاده معلومات المق
استیانلرک مدت مذ کوره ختامند نصکره درسعادت

اعلامات شرعیه اجرا دائره سنه مراجعت
ایلملری اعلان اولنور .
فی ۳۰ کانون اول سنه ۳۱۲

متوفی احمد اغا ورثه سنک شریفه اولکر خانم
ذمتنده قسمت عسکری محکمه سندن ویریلان
برقطعه مقتضا اعلامی موجبجه الاجقاری اولان
مبالغ معلومه نك تأمین استیفاسی ضمتنده مرهون
وفروختی محکوم بولنان چارشوی کبیر قربنده
بات بازاری نام محله کول میداننده واقع تحتنده
اللی برنومرولی بودرومی مشتمل قرق طقوز
نومرولی بر باب وقف عباسی دکانی دروننده
موجود او طراجقی کدکنک نصف حصه شایعه سی
بوندن مقدم مزایده قونیه ورق لیرای عثمانی
بوز غروشدن درت بیک غروش بدل ایله طالبی
اوزرنده تقرر ایتیش اولدیفندن یوزده بش ضمیله
بوندن دهها زیاده طالب اولنلرک اشبو تاریخ
اعلاندن اعتباراً اوتوز برکون ظرفنده درسعادت
اعلامات شرعیه اجرا دائره سنه مراجعت ایلملری
دائرة مذ کوردن اعلان اولنور .

فی ۲۸ کانون اول سنه ۳۱۲

اسکداده یکی جامع شریف جوارنده کاش
دکانده ساکن قصاب اصنافدن احمد جمال وحسنی
افندیلرک اسکدار چارشو سنده متصرف بولندقلری
یوز یکریمی یدی نومرولی بر باب دکانلرینک
مستأجری بولنان ارمنی ملتندن مالیه طوره جی
تلماق علیه اقامه ایله کلری تخلیه دعواسندن
طولانی اقامتگاهنه کوندریلان دعوتنامه یازیلان
شرحده بواسطه آدم بولندینی خبر ویرلش
ومرقومک اقامتگاهنی مجهول بولندینی اکلشلمش
اولغله اشبو تخلیه دعواسنک شباطک اوننجی
بازار ایرتسی کونی ساعت بشده اسکدار بدایت
محکمه سندن رؤیتی مقرر ایدو کندن مدعی علیه
تلماق یوم مذ کورده بالذات محکمه به کلدیکی
ویار وکیل کوندردیکی صورتده حقنده معامله
قانونیه اجرا قلنه جنی معلوم اولق اوزره تنظیم
اولنان دعوتیه ورقه سی محکمه دیوانخانه سنه تعلیق
اولندینی کبی اوراق حوادث واسطه سیله دخی
اعلان کذیمه ابتدار قلندی .
فی ۱۷ شعبان سنه ۳۱۴
فی ۳ کانون ثانی سنه ۳۱۲

متوفی عثمان فربد افندی ورثه سنک زینب
نظیره خانم ذمتنده قسمت عسکری محکمه سندن
ویریلان ۲۳ صفر سنه ۳۱۴ تاریخلی برقطعه مقتضا
اعلامی موجبجه الاجقاری اولان مبالغ معلومه نك
تأمین استیفاسی ضمتنده مرهون وفروختی محکوم
بولنان قرتال قضاسنه تابع ارن قریه سندن واقع
یکرمی ایکی ویکرمی اوچ نومروایله مرقم طقوز
دوئم مقداری کروی ملک برقطعه باغ ایله قضاء
مذ کوره به تابع نردبان قریه سندن واقع اون
نومروایله مرقم بیوت عدیده ومستملات سائر
معلومه بی حاوی بر باب ملک منزل درت حصه
اعتباریه اوچ سهم حصه شایعه سی بوندن مقدم
مزایده به قونیه ورق لیرای عثمانی بوز غروشدن
مذ کور باغ ایکیک سکنز بوز اللی غروش
ومذ کور اوچ سهم حصه منزل دخی یدیبوز
اللی غروش بدل ایله طالبلری اوزرنده تقرر
ایتیش اولدیفندن یوزده بش ضمیله بوندن دهها
زیاده طالب اولنلرک اشبو تاریخ اعلاندن اعتباراً
اوتوز برکون ظرفنده درسعادت اعلامات شرعیه
اجرا دائره سنه مراجعت ایلملری .
فی ۸ کانون ثانی سنه ۳۱۲

بیوریلان قراره توفیقاً تحت مجزه النمش اولمغله تاریخ اعلاندن اعتباراً اون بش کون صکره بالمزایده فروخته تشبث اولنه جنی بک اوغلی بدایت محکمه سی اجرا مأموریتی جانبندن اعلان اولنور . ۲۲ کانون اول سنه ۳۱۲



بقال بدوسک ^{۳۱۳}/_{۱۴۸} نومروسیله مقید اعلام موجبنجه نفیسه خاتم ذمتده جهت کفالتدن محکوم به اله جنی اولان معلوم المقدار مبالغتک تأمین استیفاسی ضمننده مدیونته مومی الیهانک مالته قریه سنده مزارلق سوقاغنده واقع برقطعه ترلاده اوچ حصه اعتباریله متصرف اولدینی بر حصه شایعه سنک مجز و فروختی بک اوغلی بدایت محکمه سی ریاست اولیسی جانبندن تحت قراره النمش اولمغله بر موجب قرار سالف الذکر عرصه ده اوچ حصه اعتباریله بر حصه سنک اون بش کونه قدر بالمزایده فروخته تشبث اولنه جنی بک اوغلی بدایت محکمه سی اجرا مأموریت علیه سندن اعلان اولنور .

فی ۴ کانون ثانی سنه ۳۱۲



(مطبعة عامره ده طبع اولمشدر)

حفیظه خانمک حسن اغا ذمتده محفل شرعیاتدن ویریلان ۱۲ صفر سنه ۳۱۴ تاریخی برقطعه اعلام شرعی موجبنجه الاجنی اولان مبالغ معلومه نک تأمین استیفاسی ضمننده مرهون و وکالت دوریه ایله فروختی محکوم بولنان قاسم پاشاده جزایرلی غازی حسن پاشا محله سنده واقع فوقنده اوچ باب او طه و بر ابدستخانه پی حاوی یدی نومرو ایله مرقم مقدما مناو والیوم بر باب کار کیر قهوه خانه دروننده موجود کدک ایله مشتملاتندن بولنان بر مقدار عرصه نک اشبو تاریخ اعلاندن اعتباراً اون بش کون صکره فروخته تشبث اولنه جقندن طالب اولنلرک پی سورمک و بوندن دها زیاده معلومات المق استیانلرک مدت مذ کوره ختامندن صکره در سعادت اعلامات شرعیه اجرا دائره سنه صراجعت ایلملری .

فی ۸ کانون ثانی سنه ۳۱۲



دومینه قادینک ^{۳۱۴}/_{۱۴۹} نومرولی اعلام موجبنجه ارینو قادین ذمتده محکوم به اله جنی اولان معلوم المقدار مبالغتک تأمین استیفاسی ضمننده قریه سنده قیولی باغی جاده سنده متصرفه اولدینی ۲۲ نومرولی مع باغچه بر باب خانه سی بک اوغلی بدایت محکمه سی ریاست اولیسی جانبندن اعطا